

Կ Ա Ր Ծ Ի Ք – Ը Ն Դ Դ Ի Մ Ա Խ Օ Ս Ո Ի Թ Ի Ի Ն

Աւետիս Լորիսի Գրիգորեանի

«Սոթք զաւտը միջին դարերում ըստ պատմահնագիտական տուեալների»

Է.00.03 «Հնագիտութիւն» մասնագիտութեամբ պատմական գիտութիւնների թեկնածուի  
աստիճանի հայցման ատենախօսութեան մասին

Սոթքի տարածաշրջանին վերաբերող հետազոտութիւնների կարեւորութիւնը հայագիտութեան համար դժուար է գերազնահատել: Այդ թեման ունի ե՛ւ գիտական, ե՛ւ արդիական-ճանաչողական ու հասարակական-քաղաքական նշանակություն: Չնայած դրան՝ հայագետները շատ քիչ են զբաղուել նրանով: Այդ պատճառով ատենախօս Աւետիս Գրիգորեանն իր ղեկավարի, որը ճանաչուած հնագետ Յուսիկ Մելքոնեան է, եւ իր գործընկերների հետ միասին խնդիր են դրել ամենայն ընդգրկմամբ ու խորութեամբ ուսումնասիրել այս կարեւոր հիմնախնդիրը փաստագրական նիւթի ամբողջական հետազոտութեամբ՝ սկսելով պատմական ակունքներից եւ ասարտելով մեր օրերի հնագիտական պեղումներից ի յայտ եկող ուշագրաւ նիւթով: Ատենախօսութիւնն, ըստ էութեան, ամփոփում է այս ուղղութեամբ հեղինակի կատարած ծաւալուն աշխատանքը, որն արտայայտուել է նաեւ նրա՝ արդէն ընթերցողի դատին յանձնուած մէկուկէս տասնեակի չափ հրապարակումներում:

Ներկայացուած աշխատանքն աչքի է ընկնում իր մեծ ծաւալով եւ կոտ կառուցուածքով: Այն բաղկացած է Ներածութիւն-առաջաբանից, երեք գլուխներից, Եզրակացութիւններից, Օգտագործուած սկզբնաղբիւրների ու գրականութեան ցանկից եւ ծաւալուն Յաւելուածներից՝ բնագրեր, քարտեզներ ու աղիւսակներ:

Ատենախօսութեան շօշափած խնդիրների լուծման հրատապութիւնը եւ յարակից հարցերը հանգամանակից ներկայացում են Ներածութեան մէջ: Այստեղ տրուած են ընտրուած թեմայի արդիականութիւնը, կատարուած հետազոտութեան նպատակներն ու խնդիրները՝ հիմնական նպատակը համարելով՝ 2010 թուականից գործող «ՀՀ ԳԱԱ ՀԱԻ հայ-գերմանական հնագիտական արշաւախմբի ուսումնասիրութիւնների արդիւնքներն օգտագործել՝ համակողմանիօրէն բացայայտելու միջնադարեան Սոթք զաւտում ապրած մարդկանց կեանքն ու կենցաղը, որոշակիօրէն վերականգնելու բնակավայրային,

պաշտպանական եւ հաղորդակցական համակարգերի միջնադարեան պատկերը»: Բացի այդ՝ հատ-հատ ներկայացուած են աշխատանքի գիտական նորոյթները վեց կէտերի մէջ, ուսումնասիրութեան բազմակողմանի ու բազմաբնոյթ մեթոդաբանութիւնը, նրա փորձաքննութիւնը հրատարակուած յօդուածներում, կիրառական նշանակութիւնը եւ ժամանակագրական շրջանակները: Այնուհետեւ պատշաճ կերպով ներկայացուած է նաեւ օգտագործուած աղբիւրների եւ գրականութեան հանգամանալից տեսութիւնը:

Ատենախօսութեան առաջին գլուխը («Սոթք գաւառի պատմաաշխարհագրական նկարագիրը եւ ուսումնասիրութեան պատմութիւնը» խորագրով), որը բաղկացած է երեք ենթագլուխներից, ըստ էութեան հետազօտում է Սոթքի լանդշաֆտը եւ սահմանները, ապա ներկայացնում հանգամանալից պատմական ակնարկ (ըստ անտիկ, հայկական, վրացական, արաբական աղբիւրների), ինչպէս նաեւ գաւառի ուսումնասիրութեան պատմութիւնը:

Ատենախօսութեան երկրորդ գլխում («Միջնադարեան հնագիտական յուշարձանները» վերնագրով), որը բաղկացած է չորս ենթագլուխներից, առատ փաստագրական նիւթի հիման վրայ մանրամասն հետազօտում են Սոթք գաւառի ամրոցները, բնակատեղիները, վանքերն ու եկեղեցիները, գերեզմանոցները: Գլխում մասնաւորապէս ցոյց է տրուում, որ «Պայմանաւորուած Դոփեանների յաջողութիւններով՝ XIII-XIV դդ. խաչարագործութիւնը վերելք է ապրում, շրջանը վերածում է Հայաստանի խոշորածաւալ խաչարարի ամենամեծ կուտակման վայրի: Մէլիք-Շահնագարեանների ռազմա-քաղաքական յաջողութիւնները նպաստում են XV-XVII դդ. խաչարագործութեան զարգացմանը Սոթքում»:

Ատենախօսութեան երրորդ գլխում («Երկրական մշակոյթը» վերնագրով), որը բաղկացած է երեք ենթագլուխներից, ամբողջական ձեւով ներկայացուում են առանձին՝ Սոթք գաւառի խեղեգործութիւնը, ապա՝ տնտեսական միւս զբաղմունքները եւ դրանց հետ կապուած գտածոները: Չափազանց արժեքաւոր է առանձին անդրադարձը Սոթքի ոսկու հանքի պատմութեանը եւ Շորժայ գիւղի մօտ կանաչ նոնաքարի՝ դահանակ-ուվարովիտի օգտագործմանը միջնադարում: Անպայման նշելի է հեղինակի կարեւոր արձանագրումը. «Սոթք գաւառի բնակավայրերը կարեւոր դեր են խաղացել Դուին-Պարտաւ միջնադարեան առեւտրական ճանապարհի վրայ, որը միացրել է Կուրի եւ Արաքսի միջեւ ընկած

տարածքները»: Աշխատանքում խիստ ուշագրավ է նաև Մեանայ լճի՝ որպես նա-  
ւագնացութեան միջոցով հաղորդակցական հանգոյցի ուսումնասիրութիւնը:

Ատենախոսության մասին մեր հիմնական դիտողությունները հետեւեալ 12-ն են  
(այս հսկայածաւալ՝ 361-էջանոց աշխատանքի համար դա շատ չեմ համարում).

1. Էջ 23, 200 – Նշուած Դովեան իշխանը ոչ թէ Գրիգոր Բ-ն է, այլ Գրիգոր Գ  
(«Զինուորը»): Այդպէս նաեւ՝ նշուած է ոչ թէ Հասան Դ-ն, այլ՝ Գ-ն: Մանրամասն տեսնե՛լ  
իմ 2020 թ. մենագրութեան մէջ եւ նրան յաւելուած «Խաչէնի իշխանա-արքայատոհմի  
ճիւղագրութեան» աղիւսակը:

2. Էջ 26 – Ոսկանապատ աւանը ոչ թէ Ուտիքում է, այլ Արցախում:

3. Էջ 40, 108 – Բերդկունք ամրոցը ոչ թէ Սոթքի լեռնանցքում է, այլ Հայրավանքի  
մօտիկ քաղաքատեղիում: Նախորդ տեսակէտը վաղուց հնացած է:

4. Էջ 45 – «Բակ» – «վանք» եզրոյթների համադրութեան մասին գրելիս ճիշտ կը  
լինէր յղել իմ գրքերում մանրամասն արուած նոյն դիտարկումը. 2009 թ., էջ 235-236, 2020  
թ., էջ 205:

5. Էջ 45, 48, ... – Կրկնում է հնացած տեսակէտը, որ Սոթք գաւառի արեւելեան  
սահմանը չի անցել լեռներից, այնինչ՝ բազմաթիւ աշխատանքներում փաստարկել եմ դեռ  
Սեդրակ Բարխուդարեանի արտայայտած կարծիքի հաւաստիութիւնը, որ Տրտուի  
վերնահովիտը եւս մտնում էր Սոթքի մէջ (Օարից մինչեւ Լեւազետ վտակի գետկիցը):

6. Էջ 53, 83 – Գրիգոր Ատրնէրսեհեանը Սահլ Սմբատեանի որդին չէր, այլ թոռը:  
Սպրամ իշխանուհին էլ ոչ թէ Սահլի կինն էր, այլ՝ Ատրնէրսեհի (էջ 56):

7. Էջ 83, 87, 175 – Վիմագրերի նորայայտ անունների ցանկից պիտի հանել (կամ  
գոնէ այդ ցանկը կոչել նորայայտ անունաձեւերի) Սրհանգը: Հմմ. իմ 2020 թ. գրքում, էջ 322.  
«Դարպասներ տեղավայրի խաչքարի վնասուած բնագիրը. «Ի թվիս :ՈԻԲ: [=1173 թ.]. ի  
հալրապէտութեան տեւան /Ստեփանոսի եւ ի թագաւորութեան ...[անշուշտ՝ \*Հասանի –  
Ա. Յ.]], եւ՝ Սրահան/գս, որդի Ջաջոռա[յ] {...}, կանգնեցի զխաչս...»: Տե՛ս Գ. Յովսէփեան,  
Խաղբակեանք կամ Պոռշեանք..., էջ 16; Դիւան հայ վիմագրութեան, պր. V, էջ 74, հ<sup>տ</sup> 217:

8. Էջ 107 – Փառիսոսի Դուռն լեռնանցքը տանում էր ոչ թէ Ուտիք, այլ Արցախի  
Քուստ-ի Փառնէս գաւառը: Լեռնանցքի բարձրութիւնը 3000 մետրից բարձր չէր, այլ 2765 մ  
(անուշադրութեան վրիպում):

9. Էջ 107, 196 – Վայկունիք գաւառը Տրտուի հովտում չէր (Օար գաւառ), այլ Հակարիի Շալուա օժանդակի հովտում (Քաշաթաղի շրջան), ինչպէս բազմաթիւ աղբիւրներով ցոյց են տուել ատենախօսին ծանօթ աշխատանքներում:

10. Էջ 188, 191 – Երուանդի եւ Արտաշէսի զօրքերը Ուտիքից եկել են ոչ թէ Սոթքի լեռնանցքներով, այլ Դիլիջանի լեռնանցքով, որը Ադուէ գաւառից անցնում էր Գեղարքունի գաւառ: Ուտիքում նրանք Խաղիսաղի արքայական ձմերոցում էին, որից պիտի բարձրանային Աղստեւի հովտով:

11. Գրականութեան ցանկում Միխիթար Գօշի Դատաստանագիրքը պիտի յղուէր 1975 թ. քննական հրատարակութեամբ, այլ ոչ թէ 2001-ի համառօտուած բնագրով: Պակասներից կարելի է նշել Մէլիք-Շահնազարեանների հետ էապէս կապուած Տպէլ աւանի մասին մեր յօդուածը (*Ալ. Յակոբեան, Յակոբ Միմոնեան, Դաղիվանքի նորայայտ արձանագրությունը եւ Տպէլի տեղադրութեան հարցը // «Պատմա-բանասիրական հանդէս», Եր., 1998, հ<sup>տ</sup> 1-2, էջ 227-232*):

12. Վերջապէս՝ լաւ կը լինէր գրել «ժողովածո» եւ «հաւաքածո», քանի որ, ինչպէս մեծ ուսուցիչներն էին սովորեցնում, դրանցում առկայ է «ածո» վերջածանցը (հմմ. «գտածո», «հանածո», այլ ոչ թէ «ածու» բառ-բաղադրիչը, (որի իմաստն է՝ «պարել» են, հմմ. «թեկնածու», «ծաղրածու»):

Ինչպէս տեսնում ենք, ատենախօսութեան մէջ շարադրուած առանձին փաստերի հետ կապուած՝ մեր դիտողութիւններն ըստ էութեան առաջարկներ են, որ պիտի նպաստեն սպասուելիք մենագրութեան մէջ վրիպումների բացակայութեանը (անշուշտ, լաւ սրբագրումից յետոյ), որպէսզի հեղինակի աշխատանքը դառնայ է՛լ աւելի կատարեալ (իրօք, ատենախօսից սպասում ենք յաջող պաշտպանութիւնից յետոյ առաջիկայ հետազօտութիւններում նոր գիտական յաջողութիւններ):

Այսպիսով՝ Աւետիս Գրիգորեանի գրախօսուող թեկնածուական ատենախօսութիւնը արժեքաւոր, յաջողուած պատմա-հնագիտական ուսումնասիրութիւն է, որն ամբողջական պատկերացում է տալիս խնդրոյ առարկայ տապաճաշրջանի մասին, մատնանշում նրա հետազօտման կարեւորութիւնը Հայոց պատմութեան կարեւորագոյն հարցերի խոր ընկալման գործում: Այն գրուած է բաւարար գիտական կոռեկտութեամբ, անսխալ, հաճելի ընթերցուող հայերէնով, շարադրանքը համոզիչ է,

յատակ ու տրամաբանական: Յաւելենք նաեւ, որ աշխատանքի 18-էջանոց Սեղմագիրը կազմուած է ՀՀ ԲՈԿ-ի պահանջներին համապատասխան եւ ամբողջապէս արտացոլում է աշխատութեան բովանդակութեանը (այդպէս նաեւ՝ սեղմագրի վերջում տրուած ռուսերէն ու անգլերէն ամփոփումները): Ատենախօսութեան բոլոր դրոյթները լուսաբանուած են հեղինակի եւ իր հեղինակակիցների հրատարակած 1 գրքում ու 13 յօդուածներում: Խիստ տպաւորիչ են աղբիւրների եւ գրականութեան պատկանելի ցանկը (24 էջ)՝ հայերէն եւ օտարալեզու սկզբնաղբիւրներով ու մասնագիտական, գրականութեամբ, եւ յատկապէս՝ ատենախոսության ծաւալուն Յաւելուածները, որ սկսում են քրեստոմատիկ աղբիւրագիտական հատուածով (պատմիչների ու յիշատակագիրների դրուագներով, նորայայտ վիմագրերի ու վաւերագրերի բնագրերով) եւ շարունակուում բազմաթիւ քարտեզներով ու աղիւսակներով: Ի դէպ, չմոռանանք նշել նաեւ գործընկերային յաջող աշխատանքը՝ հեղինակակիցների, արտասահմանեան մասնագետների, «Էրեբունի» թանգարանի հետ եւ այլն:

Ամփոփելով՝ Աւետիս Գրիգորեանի «Սոթք գաւառը միջին դարերում ըստ պատմահնագիտական տուեալների» աշխատութիւնը կարելի է լուրջ աւանդ համարել հայագիտութեան մի կարելուր բնագաւառում, որը նկատելի օգտակարութիւն կ'ունենայ հետագայ բոլոր հետազօտողների ու նաեւ քաղաքական-պետական շրջանակների համար: Բնականաբար, այն կարող է օգտագործուել նաեւ դասագրքերի, տեսական-գործնական ձեռնարկների եւ ամփոփիչ աշխատանքների շարադրանքի մէջ:

Աւարտելով պաշտօնական կարծիքս՝ յայտնում եմ յարգարժան գիտխորհրդին, որ սոյն աշխատանքը իր գիտական պատշաճ մակարդակով, առաջին անգամ գիտական շրջանառութեան մէջ դրուած ծաւալուն նիւթերի հմտալից քննութեամբ, ուշագրաւ դիտարկումներով ու հարցադրումներով, իր բերած գիտական նորոյթներով եւ կատարուած մանրագնին հետազօտական աշխատանքի մեծ ծաւալով ամբողջապէս բաւարարում է թեկնածուական ատենախօսութիւններին առաջադրուող պահանջներին, ուստի նրա հեղինակը լիովին արժանի է Է.00.03 «Հնագիտութիւն» մասնագիտութեամբ պատմական գիտութիւնների թեկնածուի աստիճանին: Ելնելով դրանից՝ ՀՀ ԳԱԱ Հնագիտութեան եւ ազգագրութեան ինստիտուտում գործող ՀՀ ԲՈԿ-ի 007 մասնագիտական խորհրդին առաջարկում եւ միջնորդում եմ՝ ներկայացուած ատենախօսութեան հեղինակ Աւետիս

Լորիսի Գրիգորեանին շնորհել իր հայցած պատմական գիտութիւնների թեկնածուի գիտական աստիճանը:

Պաշտօնական ընդդիմախօս, ՀՀ ԳԱԱ Արեւելագիտութեան  
ինստիտուտի Քրիստոնէայ Արեւելք բաժնի վարիչ, պ. գ. դ.՝



Ալեքսան Յակոբի Յակոբեան

Պատմական գիտ. դոկտոր Ա. Յ. Յակոբեանի ստորագրութիւնը հաստատում եմ.

ՀՀ ԳԱԱ Արեւելագիտութեան ինստիտուտի  
գիտական քարտուղար՝



Եւա Յարութիւնեան

20.05.2023 թ.

